

2015

# Wiesneus



Win  
mooie  
prijzen!

Mèhèhèt  
heul grappige  
schaopenmoppen!

EN OK

VERHAOLEN, GEDICHIES,

PUZZEL, KLEURPLAOT,

MEZIEK EN JAMMIE HARTJES!



en kniener!

En dat allemaal in het Drents!



Jongens en meisjes,

Eén keer in het jaar verschijnt het tijdschrift Wiesneus. Die van 2015 heb je nu in handen en we hopen dat je het een mooi blad vindt. Hopelijk is er voor ieder van jullie wat bij. Deze hele Wiesneus gaat over liefde en vriendschap, bij mensen maar ook bij dieren.

De Wiesneus is een uitgave van het Huus van de Taol. Alle stukjes zijn daarom in het Drents geschreven. Je zult merken dat lezen in het Drents niet zo moeilijk is. En er is vast en zeker wel iemand (je juf of je meester, een broer of een zus, je vader of je moeder, je opa of oma, de oppas of wie dan ook) die het leuk vindt om voor te lezen. Er staan ook Drentse puzzels in deze Wiesneus. Hiermee kun je mooie prijzen winnen! Doe dus mee!

We zijn er heel blij mee, dat Natascha Stenvert aan deze Wiesneus heeft meegewerkt. Natascha heeft de tekeningen in de boeken van Kolletje gemaakt. Zij maakte ook de tekeningen en strips in dit blad. Begin maar gauw te lezen in deze Wiesneus 2015. Wij wensen je veel plezier!

Als je nog vragen hebt schrijf gerust naar [info@huusvandetaol.nl](mailto:info@huusvandetaol.nl)

JAN GERMS, DIRECTEUR VAN HET HUU VAN DE TAOL


Postbus 163, 9410 AD Beilen.  
Wattweg 2a, 9411 PX Beilen.  
Tillefoon [0593] 37 10 10.  
E-mail: [info@huusvandetaol.nl](mailto:info@huusvandetaol.nl)  
Internet: [www.huusvandetaol.nl](http://www.huusvandetaol.nl)



Dizze Wiesneus is maakt mit geld van Drentse gemienten en de provincie Drenthe.

## Inhold

Verkering	3
Knuffeltiesdag	4
Drentse Woordzucker	6
Zuuk de verschillen	7
Kleurplaat	8
Het neie wichie	9
Verkering	10
Max	11
Jammie hartjes	12



## Verkering



*Ik bin vandaag zo vrolijk, zo vrolijk, zo vrolijk.  
Ik bin vandaag zo vrolijk, zo vrolijk was ik nooit!"*

Ja, gek hè, da'k zo vrolijk bin. En dat ik zomaor zung.  
En dat terwiel 't op schoel nog niet zo hiel geweldig gung.  
Ik har een drie veur aardrijkskunde en een vier op taol.  
Maor dat kan mij eig'lijk niet zo hiel veul schelen allemaol.  
Die aandern hadden zuch vast veul beter veurbereid.  
Maor dat kun ik niet wachten, want... ik heb een meid!


Ik scheut er naost met 't voetballen. 'k Har de kop der niet goed bij.  
'k Kreeg roezie met de juffrouw want ik luup niet in de rij.  
De jongs, die kunt 't niet velen. Zie hebt al op mij speid.  
Maor wat kan mij dat schelen? Ik heb teminnen een meid!

Martin hef twee katten, ien dervan is scheel.  
Henkie hef twee pappes en twee mames momenteel.  
Dennis hef een trekker waor e smangs op rieden mag.  
En Alex hef een crosser waor e met deur 't veld hen jag.  
Kevin zien hond is drachtig en Michel hef een geit.  
Almaol mooi en prachtig, maor... ik heb een meid!

Gistern in de pauze stun ik zo wat tegen de muur.  
En toen gung zij veur mij staon. Ik kreeg een kleur as vuur.  
Toen zee zij: 'Verkering?' en toen zee ik: 'Best.'  
Nou toen bin wij samen nog even an 't knikkern west.  
Toen hef zij verleuren. 't Was ien en al geschrei.  
Ik zee: 'Kom op, niet zeuren, dat kriej aj speult met mij.'

Maor... nou wee'k er toch niet van; nou bin ik bar beneid.  
Of ik mörgen nog zeggen kan: 'Kiek, daor lop mien meid.'  
Misschien is 't mörgenvrog wal al weer over met de lol.  
Nou ja, dan he'k in elk geval mien knikkerbuul weer vol!

HARM DIJKSTRA





Kolletje hef veur heur veerde verjaordag toversokken ekregen van tante Laetitita. As ze heur namen Katharina Orselia Laetitita voluut zeg, gebeurt der wonderlijke dingen.



## Knuffeltiesdag

Kolletje wordt wakker. Het is zondag en stil in huis. Papa, mama en Kees slaapt uit. Kolletjes knuffelhondje Waffie hef zien ogen al lös.

'Ha Waf, lekker eslaopen?'

Waffie zeg niks. Nou döt e iniens of e slap.

Kolletje gef hum een smokkie op de neuze. 'Dat vien ie wel fijn, hè Waf?'

Ze pakt heur hondje op en giet hen de badkamer um te plassen. Mama komp binnen mit een

slaoperig heufd. Ze mut ok plassen.

'Goeiemorgen, Kol!'

As mam op de wc-bril zit, slat Kolletje heur arms um heur hen en drukt een dikke kus op mama's wange.

'Ha lekker', zeg mama en ze gef Kolletje ok een knuffel.

Samen gaot ze naar de slaopkamer. Papa slap nog. Mama kröp in bedde en Kolletje mag tussen heur in liggen. Ze probeert ok weer te slaopen, mar dat lukt niet. Ze staart naar het plafond, kek naar de rugge van mama, kek naar de rugge van papa. Hé. Wat döt die rare Waffie nou iniens? Hij kröp tegen de rugge van papa op.

'Niet doen, Waf', flustert Kolletje.

Mar even later döt het hondje het weer. Hij giet zölfs op papa's rugge springen. Papa dreit zich umme en kek Kolletje slaoperig an.

'Wat doe, Kol? Ie hebt mij wakker emaaht'.

Kolletje kek papa onschuldig an. 'Dat dee ik niet, dat dee

Waffie. Hij is vandage een beetie stout.

'Ja ja', zeg papa.

'Ik zul oe toch nooit plaogen', zeg Kolletje, ' want ik viene oe lief'.

Ze gef papa een kus.

Papa gef Kolletje een kus. 'Ie bint ok lief heur'.

'Wat doet jullie toch?' vrag mam.

'Wij knuffelt menare', zeg Kolletje.

'O, dan doe ik ok mit'.

Het is vandage knuffeltiesdag', zeg Kolletje.



Nao het eten giet Kolletje hen buten mit heur step. In de verte komp meneer De Jong an mit zien rollator en zien hondje Doerak.

'Ha, die Kolletje', groet de olde man.

'Dag meneer De Jong. Weej wat veur een dag het vandage is?'

'Zondag toch?'

Kolletje knielt neer bij Doerak die as an heur wange likt.

'Doerakkie snapt het al. Het is vandage knuffeltiesdag'.

Ze slat heur arms um het hondje hen en gef hum een smokkie op zien kop.

Meneer De Jong lacht. 'Krieg ik dan ok een knuffel?'

'Ja heur!' röp Kolletje bliede.

Dan komp Dirk der net an mit zien step.

'Hoi!', zeg hij.

Kolletje lat Doerak lös. Het hondje rent vurt.

'Ik gao weer wieder, jongens', zeg meneer De Jong. Hij knipoogt naar Kolletje. 'Die knuffel komp nog wel ies'.

'Dag meneer De Jong!' roept Kolletje en Dirk.

Ze kiekt de olde man nao die langzaam in de richting van het park löp.

'Wat veur knuffel?' vrag Dirk neisgierig.

'Weej wat veur dag het vandage is?' vrag Kolletje.

'Zondag, en dan hoef ik lekker niet hen schoele'.

'Nee, het is vandage knuffeltiesdag!' Kolletje spreidt heur arms. 'Ik gao oe een kussie geven'.

Dirk schudt wild zien heufd. 'Nee, blèh!' röp hij. Hij pakt zien step en red rap vurt.

'Wacht!' röp Kolletje. Mar Dirk wacht niet. Hij stept hen huus en giet gauw naar binnen.

'Dan zit er mar ien ding op', deinkt Kolletje. 'Ik mut mien toversokken gebruiken'. Ze knep heur ogen stief dichte, deinkt an Dirk en een kussie en zeg 'Katharina Orselia Laetitita'.

Mar Dirk is vurt. Kolletje zet dat hij veur het raam stiet en tussen de plaanten op de vensterbaanke hen buten gluurt.

Ze weinkt hum. Dirk schudt zien heufd.

'Dan komp het straks wel', deinkt Kolletje. Want Dirk is heur beste vriendje en die holdt niet van binnen blieden, dat wet ze zeker.





# Drentse Woordzucker

Bij dizze puzzel moej Drentse woorden zuken. De woorden die aj vienden mut staot onder de puzzel. De woorden staot in de puzzel van links naor rechts, maar ok van rechts naor links en ok schuin. Aj het goed doet dan komp der een Drentse zin uut as oplössing. Die zin mailen naor: [info@huusvandetaol.nl](mailto:info@huusvandetaol.nl). Schrief in de mail oen naam, oen adres, hoe old aj bint en op welke

schoele aj zit. le magt de oplössing ok mit de post sturen naor: Huus van de Taol, Postbus 163, 9410 AD Beilen. En dan wil wij ok graag dezölfde gegevens hebben as hierboven vermeld staot. Insturen veur 20 april 2015. Onder de goeie inzendingen verlotte wij een mooie pries!

N	E	I	K	E	O	B	G	A	D	E	E	L	E	G
E	B	A	O	S	N	O	N	N	R	D	I	I	I	J
K	U	M	F	M	E	M	I	L	E	F	G	E	T	I
E	U	T	G	O	M	U	R	E	E	E	E	F	L	E
I	K	B	U	K	U	U	E	F	Z	I	N	D	E	I
K	P	P	U	K	E	R	K	F	T	L	N	E	F	G
S	I	O	N	I	R	B	R	I	R	E	I	S	F	O
R	E	K	S	E	D	L	E	N	A	I	D	B	U	O
E	N	E	T	R	K	O	V	G	H	S	N	R	N	P
M	E	I	T	D	N	E	I	R	V	N	E	I	K	I
M	K	O	L	E	G	M	I	M	A	A	I	E	U	N
O	H	O	P	E	N	P	M	K	E	A	R	F	S	K
R	R	R	E	D	E	I	L	B	G	K	V	I	S	S
B	K	I	S	T	O	E	R	D	O	E	N	E	I	E
M	O	O	I	E	M	E	I	D	K	V	W	E	E	N





- |                |                |                 |
|----------------|----------------|-----------------|
| BLIEDE         | KNIPOOGIE      | STOERDOEN       |
| BROMMERSKIEKEN | KNUFFELTIE     | VEKAANSIELIEFDE |
| BUUKPIENE      | KUSSIE         | VERKERING       |
| DAGBOEKIE      | LIEFDESBRIEFIE | VRIENDINNEGIE   |
| DREUMEN        | MOOIEMEID      | VRIENDTIE       |
| GELOK          | MUURBLOEMPIE   | WEGKIEKEN       |
| GNIFFELN       | OFGUUNST       |                 |
| HARTZEER       | ROOIEKOP       |                 |
| HOPEN          | SMOKKIE        |                 |

OPLÖSSING: .....

.....

# Zuuk de verschillen!!



Zuuk de vijf verschillen en kruus ze an. Knip de puzzel uut en vul de gegevens hieronder in. Stuur dan op naor: Huus van de Taol, Postbus 163, 9410 AD Beilen. Insturen veur 20 april 2015. Onder de inzenders wordt een mooie pries verlot.

Naam: .....

Adres: .....


Woonplaats: .....

Ik zit in groep ... van (school) .....en bin ... jaar

**Kangoeroe redt zien baosie**

In Australië kwam een man klem te zitten under een boom. Een kangoeroe hupte gauw naor het hoes van de boer en bonsde net zolang met zien kleine veurpooties op de deur, totdat de boerin het deurkreeg en achter het springende dier an gung.





Aj raoden hoeveul  
peerdeblooumen hier staon muj  
ze alle vieftien hebben!

Dizze plaat maj kleuren en veur 20 april 2015 opsturen naor het Huus van de Taol, Postbus 163, 9410 AD Beilen. Doe der een briefje in mit je naam en adres. Schrief der ok even bij op welke school aj zit en in welke groep. Veul (kleur)plezier!!  
Idee: Aj dizze Wiesneus hiel wilt holden kuj de kleurplaat ok even kopieren.



## Het neie wichie

Lacht ze naor mij  
of lacht ze mij oet  
'k weet echt niet  
wat ik wel denken moet

dat neie wicht  
bij oes in de klas  
maakt alles hiel aans  
dan dat 't vrogger was

'k heb fouten in mien sommen  
en fouten in mien taol  
dat is veur mij  
toch echt niet normaal

ik liek wel niet wies  
ik kiek niet weer naor heur  
mor de zun gef heur haar  
zo 'n biezondere kleur

zie lacht; ik kiek toch!  
Wat kan 't mij ook schelen  
mien knickers gao 'k straks  
as zij wil, met heur delen.


FROUWIEN KLAASSENS-PERDOK



### Een sprookje...

Der was ies een leeuwin die in het Queen Elizabeth National Park in Oeganda een kob (een soort antilope) doodmeuk en opvrat. Dat doet leeuwen nou ienmaol. Het jong van de antilope-moeder bleef allén achter. Het was nog een hiel jong kalfie en het kleine ding wus nog niks van gevaor. Het leup dan ok zunder angst en vrees naor de leeuwin, waor het prebeerde tussen de poten van het roofdier wat te drinken. De leeuwin was hielemaol veraldereerd en wus niet wat e dermet an mus. Drie kwartier lang bleven de leeuwin en het kleine kalfie bij mekaar lopen. Toen kwam der een parkwachter an in zien grote landrover. De leeuwin schruk en pakte het kalf veurzichtig in het nekvel en dreug het hiel veurzichtig naor een rustige, veilige plek. Daor zul de ranger het kleine dier gien kwaod doen kunnen.

Jammer genog kreeg dit sprookje gien gelukkig èende en gung het niet van 'en ze leefden nog lang en gelukkig'. Want nog diezölfde dag kwam der een aandere leeuwin en die hef de jonge kob opvreten.





# Verkering

Ik heb vlinders in de buuk. Soms heb ik het warm en kold tegeliek. Want... ik geleuf dat ik verkering heb. Het is eigenlijk ofgelopen maandag al begund. Ik zal je vertellen hoe of het gaon is... Natasja en Kim bint dikke vriendinnen. Zie kunt zowat niet zunder mekaar. Aj de ien ziet, dan ziej de aander ok. Natasja zit an de iene kaant van de klas, vlakbij het raam. Kim zit hielemaal veuran bij de deur. Eerst zaten ze naost mekaar, maor dat mag nou niet meer. Oeze meester weur der gek van. De hiele dag zaten ze te proten en te giebeln. Opletten deden ze nooit. In de pauze bint ze vanzölf wal altid weer bij mekaar. En as de klas weer begund is, dan hebt ze lang niet genug tied had um mekaar alles te vertellen. Daorum stuurt ze mekaar briefies.

Ofgelopen maandag gaf Natasja net nao de pauze een briefie an Alex. Die gooide het bij Hans op zien taofelie. Hans stak zien aarm hen achtern en Ellie pakte het gauw oet Hans zien haand. Ellie mikte daornao het briefie naor Heleen en die... greep mis. Het briefie vuul op de grond en natuurlijk zag oeze meester dat. Die is ok niet achterlijk. Natasja kreeg een vuurrooie kleur.

'Zo Natasja, dit briefie mag ik zeker wal even veurlezen?' zee meester, en hie lachte der hiel gemien bij. 'As het namelijk een geheim was, haj het tot nao schoeltied bewaren moeten. Maor nou is het gien geheim meer, want ik kan het lezen.' Natasja kreeg de kop nog rooier.

'Asjeblijft meester,' zee ze, 'niet doen, heur. Lees het asjeblijft niet veur.'

Maor meester schudde met de kop en zee: 'Ik gao dit briefie gewoon an de hiele klas veurlezen. Dat is lichtkans de ienige manier um derveur te zörgen dat jullie beter oplet en dermet stopt van die onneuzele briefies te sturen.'

Hie trök een plechtig gezicht en toen kregen wij allemaal het volgende te heuren: 'Op dit slim geheime papiertie stiet: Hoi Kim. Wat vin jij van Willem. Ik vin hum een stuk!'

Het weur een geweldig kabaal in de klas. Elkenien lachte en verscheiden jongens en wichter wezen naor mij. Nou har Natasja een donkerrooie kleur, maor mien kop was vast nóg rooier. Ik har het gevuul asof ik locht gaf. Meester kwam op mij an en zee: 'Van harte fillesteerd, Willem!'

Toen klapt'e in zien handen en reup boven het kabaal oet: 'Nou wil ik gern daj gewoon weer hard an 't wark gaot.'



Daor zeg ie zowat! Hard an 't wark gaon. Dat is makkelk zegd, maor ik kun mien gedachten der niet meer bij holden. Stiekem keek ik opzied naor Natasja, maor zie keek mien kaant niet oet. Dat was dus ofgelopen maandag, dat oeze meester zo stom dee. Nou is het vrijdag. En de hiele week is Natasja op het schoelplein veur mij vortlopen.

Vanmiddag hadden wij gymnastiek. Dat was in de sportzaal. Nao de gymles muchten wij metien naor hoes. Het was weekend. De jongens waren allemaal al vort oet de kleedkamer.

'Succes met je verkering, Willem,' zee Alex nog as grappie toen e vortleup. Toen ik in 't fietsenhok kwam, stun allén mien fiets der nog. En... nog iene, een wichterfiets.

Natasja stun in de deurgang toen ik mien fiets van het slot dee. Zie har weer een rooie kleur.

'Stom hè, Willem?' zee zee.

'Wat bedoel ie? Wat is der stom?' vreug ik.

'Nou, van dat briefie. En dat meester die veurlas.' Ik knikte: 'Hartstikke stom.'

Ik wol met de fiets an de haand an Natasja langs lopen, maor zie greep mien stuur vast en heul mij tegen en zee: 'Maor ik mien het wal heur!'

Heur gezicht weur nog rooier as rood en toen zag ik dat ze hiel lieve, blauwe ogen har. Ik haolde diep aodem en toen drukte ik een smok op heur lippen. Ik sprung op mien fiets en racete van het schoelplein of. Het was of mij het hart oet de ribbenkast bonkte.

En tja, ik denk nou dus da'k verkering heb.

DICK BLANCKE OET TATTOO OP MIEN SCHOLDERBLAD (HET DRENTSE BOEK, 2001)



# Max

*refrein*  
 Max, dat is mien hond  
 Max, dat is mien dikke vriend  
 Max, dat is mien maotie  
 Max, Max, Max

Zie je zien steert  
 Zwiép, zwiép, zwiép  
 Zien steert zwiép hen en weer

Vuul je zien tong  
 Slik, slik, slik  
 Hie slikt mij elke keer

Met Max lekker dicht tegen mien wang  
 Dan bin ik echt niet bang, bang, bang

*refrein*  
 Heur je zien geblaf?  
 Waf, waf, waf  
 Max giet mal tekeer

Vuul je zien vacht  
 Lekker zacht  
 Ik knuffel hum aal weer

Met Max lekker dicht tegen mien wang  
 Dan bin ik echt niet bang...

TEKST EN MUZIEK: M. SCHOLTEN & M. LUBBERS

UUT: JAMERO, ZESTIEN NIEUWE DRENTSE KINDERLIEDJES.



Scan de qr-code, dan kuj het liedtien heuren en een dansie zien.





# Jammie hartjes!

*Wat bij neudig:*

200 gram bakmeel  
100 gram witte suker  
1 ei  
100 gram botter  
een paar eetlepels jam  
bloem



*Wieder:*

Hartiesvorm um koekies uut te snieden  
bakplaat, bakpapier

*Hoe moej het doen?*

Zet eerst de oven an op 180 graoden um veur te verwarmen, haal de bakplaat uut de oven en leg het bakpapier op de bakplaat.

Snie de botter in kleine stukgies en meng daor de suker en het bakmeel deur. Dit moej allemaol goed deur mekaar kneden. Dat kan mit een mixer mit deeghaoken of gewoon mit oen (gewassen!) haanden.

Aj dat edaone hebt, doej het ei erdeur.

Strooi wat bloem op het aanrecht en rol het deeg uut tot een plak van ongeveer een halve centimeter dik.

Mit het vormpie kuj nou de harties uut het deeg steken. Of snie zelf mit een messie mooie hartiesvormen uut. Leg de harties op de bakplaat. Maak mit een vinger koelegies in het midden van de harties en schep door mit een lepeltie de jam in.

Leg de koekies niet te dichte bij mekaar, want zij zet nog wat uut in de oven.

Doe de bakplaat in de oven en bak de koekies ongeveer 10 tot 12 minuten in de oven totdat ze licht broen bint.

Laot ze daarna ofkoelen.

An wie gaaj de koekies geven?

